



本校略史

蔣克秋

本校開辦於民國十九年一月六日。迄今業已七年又半。以年為綱。以月為目。絜其綱而捨其目。此所以有七週年紀念特刊之發行也。本校創辦人為黃資旦張貞樑兩先生。贊助之者皆社會碩彥。如唐榴林文慶蕭保齡陳樹南諸先生等。黃任校長。張董其事。上課數月。學生自八十餘人。增至四百餘人。蓬勃崢嶸。春風滿座。開僑生學習國語之先河。為本坡國語學校之首屈一指者。年餘。黃校長以莫須有返國。張君亦以事不能兼顧辭矣。平地風波。出人意料。此誠本校之大不幸也。繼長之者為黃資恩先生。厥後土產下跌。不景籠罩。學生祇餘九十人。此為本校最竭蹶之時期也。迨現校長黃資禪先生繼任。挽狂瀾於垂倒。迴弱水而東流。舊生漸集。學者踵至。兩年之間。氣象一新。今者學生已達二百餘人。循是而為之。復興之業。可為預卜也。本校開辦費。概由黃張兩先生捐助。未嘗向各界勸募。即每月之經常費。亦由學費挹注。蓋本校教職員半係義務性質。原不為經濟所左右。開辦以還。而克維持不墜者。豈無故歟。本校同學有一千四百餘人。畢業生七屆。計三百餘人。大多數皆致力於社會事業。管子謂十年樹木。百年樹人。樹人之難。不言而喻。然則孟子亦謂得天下英才而教育之。三樂也。教育雖難。但能樂而為之。難者亦易矣。創業維艱。守成不易。值茲七週年特刊發行之日。略述其過去。俾愛護本校者知其本焉。